

鉛 汞 法 象



道藏輯要

金液還丹印證圖詩

三

胃集十一

鉛汞詩曰

鉛出白金汞產砂丹家便把此來誇若將金石為真藥猶播禾
變望長麻坎內黃男名汞祖離宮玄女是鉛家分明辨取真和
偽產出真鉛似馬牙

世上狂妄邪師因見丹經紫書以真鉛真汞為大丹藥遂猜
為土石中出鉛礦中所提白銀為真鉛朱砂中所抽水銀為
真汞便將此訣寶秘以為大丹之基誇獎誘惑盲瞽世人自
高自是以非賣金信質誓不輕傳世之愚夫見其高談濶論
覬覦世利將謂點銅乾汞以濟身家殊不知鉛銀砂汞金石
草木乃後天地生渣滓有形之物氣類不同焉能成丹縱有

成者止可濟貧救困助道之資而已豈能合我之體而居以
點化凡軀回陽換骨而形神俱妙者哉若將金石砂汞爲真
鉛真汞者猶種禾麥而望長麻不亦愚乎豈知真鉛產在坎
宮真汞生居離位坎乃北方正氣屬水水爲金子水返產金
母隱子胎故虎向水中生也虎舍在西曰兌兌金生水水中
產金是爲真鉛陰中之陽外雌而內雄中含戊土故曰黃男
雖然鉛是兌宮金水所產而坎中陽爻原屬於乾劫運未交
之先乾因顛蹶馳驟悞陷於坤乾之中爻損而成離離本汞
居故曰坎內黃男名汞祖也離乃南方正氣屬火火爲木子
火還孕木子藏母胎故龍從火裏出也龍家在東曰震震木

道藏輯要

金液還丹印證圖詩

三

胃集十二

生火火中產砂是爲真汞陽中之陰內雌而外雄中含已土
故曰玄女雖然汞是震宮木火所生而離中陰爻原屬於坤
混沌攪落之後坤因含孕育得配於乾坤之中爻實而爲
坎坎本鉛舍故曰離中玄女是鉛家也若能識真辨僞知得
真鉛真汞根源出處採而餌歸黃金室內調水運火行一時
得藥之功鍊十月脫胎之事工夫自到真丹自結生成一味
白馬牙也此乃金丹之真景象非譬喻也昧之者雲泥異路
知之者針芥相投希微哉鉛汞產出之真馬牙也噫